

# KORINTIAN

## vdwa Paul gv Siti Lynyinvbv Jinam

### Mintamchonam

Paul gv Korintian vdwa siti jidvnam si Gvrja gvla nw gv adwkakubv rimi sirilo lvktoku. Gvrja gv nyi megonv Paulnyi rinying riru nyato, vbvri-tola vdwo sum bvnglwkw jito kudw nw alvminsi bv rinwng nama kaatamla, okv nw gv kaibv mvngpu nama minla riyatoku.

Paul siti sum lvkrap lo nw gv oguaingbv Korint Gvrja nga nvchi minsu pvdw hum lvktoku. Ogulvgavbolo nw ham rinik minik nama okv Gvrja nyi vdwgv haak nama torwksinam gv lvkwng nga minbwk jitoku. Minam gv lvkwng ngv nw vbv minik mirikla nyarjikau nama mvngpubv torwk siku lokv ninyia tvvnwng makv vla haaknv vdww bunu atuv mvngdin sutoku, okv alvsutoku. Vbvrikunamv nw Gvrja nga Judia mookugv kristan nyi heema opin vdwa ridur nvdubv morko jise gv lvkwng nga dinchi rung bv mintoku. Ataranya mvrwmvpa lo Korint hoka nyi mego bunu atubongv jvjvnnv Apostol gubv minsula okv Paulnyi mvnvrurv gubv minla riri lo Paul bunugv kaaku lo nw jvjvnnv Apostol bv rila mvngging sutoku.

#### **Arwng lokv darlinnam**

Mintamchonam (1:1-11)

Paul okv Korint lo gvrja (1:12-7:16)

Judia gv Kristan vdwa morko jinam (8:1-9:15)

Paul gv nw atu v Apostol gubv mvngging suku-  
nam (10:1-13:10)  
Minyabv minkunam (13:11-13)

<sup>1</sup> Pwknvyarnv gv mvngku lokv, Kristo Jisu gv Apostol gubv darkunam Paul ngo gvlokv, okv boru Timoti gvlokv—

Korint lo Pwknvyarnv gv Gvrja ngala okv Akaia mooku lo Pwknvyarnv gv nyi mvnwngnga lvk-dunv:

<sup>2</sup> Ngonugv Abu Pwknvyarnv okv Ahtu Jisu Kristo nonua aya okv sarsopoyo nga jigv yilaka.

*Paul Pwknvyarnvnyi umbonyikv vnam*

<sup>3</sup> Klvi ngonugv Ahtu Jisu Kristo gv Abu Pwknvyarnvnyi umbonyikv vlaju, ayanv Abu, nw gvlokv ridur mvnwngngv aadunv! <sup>4</sup> Nw ngonu mvnwng gv adwkaku rinyi ridurdu, ogulvgabv vbolo ngonu oguaingbv Pwknvyarnv gvlo ridur ha paadudw, ho apiabv ngonuaka kvvbi vd-wgv adwkaku lo ridur modubv vla. <sup>5</sup> Kristo gv achialvbv hinchng chingnam lo ngonu ching-min gvnam apiabv, vkv aingbv Kristo gvlo ngonu Pwknvyarnv gv kairungbv ridur a paaming gv-dunv. <sup>6</sup> Vdwlo ngonu hirukaya namgo paadubolo, hv nonua ridur lvgabv okv ringlinbaalin kunam lvgabv; okv ngonu ridur nama paadubolo nonuno ka ridur nama paadunv, ngonugv apiabv hirukaya nga saktv ladubv gwlvk ka nonua ka jidu. <sup>7</sup> Vkvlgabv ngonugv nonua mvngtin v vdwo biv mare; ngonu chindu nonu ngonugv hirukaya hinam a himing gvnam apiabv, nonuka ngonugv ridur paanam a paaming gvta dunv.

<sup>8</sup> Achiboru vdwa ngonu nonua Asia mooku lokv adwkaku paanam a lvkodv minpa nvpv vla mvngdu. Ngonua kudungkua ridubv jinam angv achialvbv kainvgo okv ai ka nvgo ngonu turdubv mvngtinnam nyemu toku. <sup>9</sup> Ngonu gvlo sinamv aapv kunvgo vla ngonu mvngtoku. Vbvritola si ngonu atua mvnging simu dubv okv sinv nga turkur mokunv Pwknvyarnvnyi mvnging simu dubv vla riya kunam gukunyi. <sup>10</sup> Nw ngonua vkvnv achialvbv alvmanv sijiku \*loka ngonua ringtoku, okv ngonua ringbwngre; okv ngonu n gvlo mvngtin ha mvnglwkre okv nw ngonua lvkodv ringtare, <sup>11</sup> nonuno ngonua nonugv kumnam lokv ridur yadu. Vkvlgabv ngonugv lvgabv kumnam dvdv nga riji runggre, okv Pwknvyarnv ngonua aya jire; okv nyi achialvgo ngonugv lv-gabv ninyia umbonyikv vre.

*Paul rungnam a rungngv toku.*

<sup>12</sup> Vjak si ngonugv goosu namv ngonugv mvngnamsaknam mv alvyaungbv† minlin jido ho ngonu nyia mooku so alvbv ripv dakpv kunv, okv jvjv bv minbolo ngonugv nonua lvkobv ribam dakbam siku lokv ripv kunv, darwk bv okv alvbv Pwknvyarnv gv lokv. Nyia mookugv chinampaanam lokvma vbvritola Pwknvyarnv gv aya lokv ngonu ritoku. <sup>13-14</sup> Ngonu nonuno oguaingbv purila chinla ridw um lvdunv. Vbvritola nonugv vjak ngonua chingg v dunam mv tunggo nyimwng, okv ngo mvngtindu nonu

---

**1:8** 1Kor 15:32 \* **1:10** achialv bosukapadubv matarbv sitoku; Megonv kitaplo doodubosukapadubv sitoku. † **1:12** habiatata; Megonv doodu kitaplodarwkrongnv.

ngonua alvbv chinpwng kaapwng reku vla mvngdu. Vbvrikunamv Ahtu Jisu gv aariku alulo nonuno ngonua hartvla okv ngonuka nonua hartv dobv ho nonuno ngonua alvbv chinpwng rikunv.

<sup>15</sup> Ngo achialvbv mvnwng sum rirungre vla mvngla ngo nonua lvnyibv aya paamu so mvngtala nonugv ho aarung dubv vla mvngchoto.

<sup>16</sup> Ngo Mesedonia bv vngrilo okv vngkur rikunyika nonua kaarwk sidubv vla rungtoku, ngoogv Judia lo moing vngrinyi nonu gvlokv ridur paanam lvgabv. <sup>17</sup> Sum ngo rungdu, ngo ajikalak manv gubv ripv ai? Vdwlo ngo rungrinyi atunvgv bvmwngbv rungmwngla vjakgobv “Vkv, vkv” okv “Makv, makv” vdubv doonv gulari? (Nonuno ngam ogugo rise vdw um mvngchin manvgo vla mvngdu nvri? Vmalo ngo kvvbi vdwa alvbv mvngku dubv vla “vkv” vmalo “Makv” vnv nyi aingbv kaapvi?) <sup>18</sup> Pwknvyarnv jvjvngv gaam a minpiabv, ngoogv nonua milvjnam angv “Vkv” vtola okv “Makv” vnamgo kaama. <sup>19</sup> Ogulvgavbolo Pwknvyarnv gv kuunyilo Jisu Kristo gv lvkwng nga Sailas, Timoti okv ngo atubongv nonua japji toku, nyi “Vkv” vnam gula okv “Makv” vnam ma, ho mabv nw Pwknvyarnv gv “Vkv” vnam yangv; <sup>20</sup> ogulvgavbolo nw Pwknvyarnv gv milvkunam mvnwng gv “Vkv” vnammv. So si vkvlvkwngbv Jisu Kristo gv lokv ngonugv “Amen” vnam a Pwknvyarnvnyi kaibogobv hartvla mindunv. <sup>21</sup> So si Pwknvyarnv atubongv ngonu hala, nonua lvkobv naadum

sikunv, Kristo gvlo ngonu turnama jvjv gubv mvjila; so si Pwknvyarnv atubongv ngonua akusubv darlinkunv, <sup>22</sup> okv nw ngonua atu tola tuprw toku, ngonugv lvgabv nw gv bokta vvkum pvvnam a jirungre vla milv jinam a kaatamla ninyigv Darwknv Dow nga ngonugv haapok lo jilwkla riduku.

<sup>23</sup> Ngo Pwknvyarnvnyi tvriakaria nvgobv gokla mindunv—nw ngoogv haapok a chindu! ngoogv Korint lo aaku manamv, so si nonua lvkodv hirukaya paamu kumanam lvgabv ripvku. <sup>24</sup> Nonuno oguaingbv mvngjing rungsedw um ngonu miriadubv rikw yama; ngonu chindu nonu mvngjing ngv haatindu. Vmabvya, ngonu nonua lvkobv kudungkua ribam dunv nonua atubongv mvngpu monam lvgabv.

## 2

<sup>1</sup> Vkvlgabv ngo nonu gvlo lvkodv aadvla nonua mvngdwk momam svnga, aaku mare vla mvngbwk pvkunv. <sup>2</sup> Ogulvgavbolo ngo nonua mvngdwk mooku bolo, yvkvudw nga mvngpu moji kunv? Ngoogv mvngdwk dubv mvkunam vdww mvngku. <sup>3</sup> Ngam mvngpu mojinv nyi vdwa ngo aagvrila mvngdwk monwngma mvngla—vkvlvkwngbv ngo ho siti a nonua lvkla jipv kunv. Ogulvgavbolo ngo chindu vdwo ngo mvngpu rinyi nonuka mvngpu mingvdu. <sup>4</sup> Ngo achialvbv adwkaku la okv haapok lo mvngru okv achialvbv nyikla sarla ritola nonua siti a lvkla jipvny; ngoogv vbvrinam v nonua mvngdwk monam lvgabvma, vbvritola ngo nonu

mvnwnngnga vdwgo pakdudw um nonua hinchin moso mvngla.

*Rimurnvnga mvngnga jinam*

<sup>5</sup> Vjak akin gonv megonyi mvngdwk mopvbolo, hv nga rinam ma vbvritola nonu mvnwnngnga—mama vdaka tunggonyi ripv. (Ngoogv svbv minam si ogulvgavbolo ngo ninyia minying nwnngma.) <sup>6</sup> Nonuno nyi cheloyanv ngv, ho nyi hum mvrit pvnvlo hv awjego mvpvku. <sup>7</sup> Vjak nonuno ninyia mvngdwk lo ngoomu manam lvgabv, ninyigv rimur a mvngnga jilaku mintvmiru yala kuka. <sup>8</sup> Okv vkvlvgabv ngo nonua dinchi rungbv mindunv ninyia nonuno jvjvbw pakrung dunvgo vla chimu runglaka. <sup>9</sup> Ngo ho gv siti hum lvktoku ogulvgavbolo nonuno vdwgo alvyaungbv pokayarka nga tormisuto kubvdw um malin nwnngla okv nonuno ngoogv minam ha tvvla rinwng nvgobv rila doopvdw ma doomadw um chinso mvngla. <sup>10</sup> Vdwlo nonuno akin gonvgv ogu rimur go ripvdw um anyubv mvngnga jiri kunyi, ngo ninyia anyubv mvngnga jidu kunv, ogulvgavbolo ngo vdwlo anyubv mvngnga doodw, vbv ngoogv anyubv mvngnga namv nonunogv lvgabv Kristo gv kaagialo lo ritoku, <sup>11</sup> Okv ngoogv vbvrinam hv Uyu ngonuam rigum nyuma dubv vla ripvvnv; ogulvgavbolo ngonu chinsudu ninyigv rinvpv vla mvngnam a.

*Paul gv Troas lo mvngdwnam*

<sup>12</sup> Ngo vdwlo Toroas pamtv lo Kristo gv alvvnv yunying nga japji dubv aalwk tokudw, ngo kaapa toku hoka Ahtu gv kudungkua nga ridu

kubv lamtv mvkok pvji nama. <sup>13</sup> Vbvritola ngo achialvbv mvngdwk toku, ogulvgavbolo ngo ngonugv achiboru Taitasnyi hoka kaapa nyuma toku. Vkvlgabv ngo hoka nyi vdwa alvbv doola kukv vpikula Mesedonia bv vngdavngra pvkunv.

*Kristo gvlokv mvgumrigum nvnv*

<sup>14</sup> Pwknvyarnvnyi umbonyikv! ogulvgavbolo Kristo gvlo ngonugv akinbv dobv ribvnam lokv Pwknvyarnv ngonua patwk nyi gv aingbv Kristo gv mvgumrigum nama soi soibv sola gokrvnam lvgabv vnggv toku. Kristonyi chinam lkvwng nga, amuk nampu nvnga mvnwnglo jukar monam aingbv Pwknvyarnv ngonu gvlo rimudu. <sup>15</sup> Ogulvgavbolo ngonu Kristo gv Pwknvyarnvnyi amok nampunv jinam aringdo hv ringlin kunam lola okv ringma dwnam lo jungsik karmunam aingbv ridu. <sup>16</sup> Yvv bunu ngoodudw, si ho bunugv lvgabv achialvbv narunam gubvrila mvkidu; vbvritola si yvv bunu ringnam a paadudw ho bunugv lvgabv turnama nampasimu dunv. Vbvrikunamv, hvkvnv kudungkua nga yvv rila redw? <sup>17</sup> Nyi kvgonv Pwknvyarnv gv doin a arv miang nv gobv mvngla korvpachu bv rinyado, ngonu vbvriinv lokvma; ngonu Kristo gv pakbu bv dinchibv mvngla japdunv ogulvgavbolo Pwknvyarnv ngonua vngmu pvkunv.

### 3

*Anw bv mingkimiyak nam pakbu*

<sup>1</sup> So si ngonua atubogv lkvwngbv lkvodv hartv sunam gubv tvdu nvgo lare? Nyi kvvbi gv aingbv tolwktoak kunam siti go nonua jiri vmalo nonu

gvlokv jiri ngonu naala vngdubv dinchi dundvw? <sup>2</sup> Mvwnwngngv chinam lvgabv okv puri kunam lvgabv ngonugv haapok lo lvkgapla vvpvnam siti ngv nonuno mabv. <sup>3</sup> Siti si Kristo atubongv lvkpvnv vla rvbwngdo okv ngonua gvla vngmupvnv. Si sai lokv lvkma vbvritola turnv Pwknvyarnv gv Dow lokv si lvkp v kunv, okv lvngcho lo lvklwkma vbvritola nyia nyi gv haapok lo lvklwk pvnv. <sup>4</sup> Ngonu vbv mindu ogulvgavbolo Kristo gvlokv ngonu Pwknvyarnvnyi mvngjwngjwnggrw dunv. <sup>5</sup> Ho hoka ngonugv lokv so kudungkua sum rila dunv vla mingv nvnv go kaama. Ngonugv rilavnv doonam si Pwknvyarnv gvlokv aapvnv; <sup>6</sup> So si hv ngonua anw bv milv kunam a kudungkua riyala rila dubv mvnngv, hv pvbv lvkp v kunam lokvma vbvritola Dow lokv. Lvkp v kunam pvbv ngv sinam a naalwkdu, vbvritola Dow ngv turnama naalwkdu.

<sup>7</sup> Pvbv nga vlvwng lvngcho lo siti bv lvkp v toku, okv um jiri hoka Pwknvyarnv gv kainv jwkrw ngv kaatam toku. Moses gv nyukmu gv ungnam mv nyero pvkuka, hv vbv kaibv ungtto Israel nyi vdvwka ninyia kaagap jinjin nyuma toku. Vbv sinam a naalwknv Pvbv ngv jwkrw kaibv aapv bolo, <sup>8</sup> vdwgo kaiyanam gubv rirekudw Dow gv kaibv jwkrw gv ridung ngv! <sup>9</sup> Miyakaya nga naalwk nvngv kaibogobv riri kunyi; ringnambaanam a naalwk nvngv vdwgo achialvbv kairungnv gubv rirekudw! <sup>10</sup> Ngonu minlado vjakgv jwkrw kaiyanv gv achialvbv ungya yanam gv lvkwngbv kvvlo gv kainvgobv ungnv angv

nyeroku. <sup>11</sup> Oguglvgabolo ayung jvmabv doobwng manvlo yunglit rinyi, dvbvsvngtambv doobwng jinvlo vdwgo yunglitnam gubv rirekudw!

<sup>12</sup> Ogulvgabolo ngonu svkvnv mvngtin go doonam lvkwngbv, ngonu achialvbv mvngrwdu.

<sup>13</sup> Ngonu Moses aingbv rima, yvvdw atugv nyukmua pulup sidu vla Israel nyi vdwm loung bv ungnam a okv nyeku nvnga kaapa mooku mato.

<sup>14</sup> Bunugv haapok v alvrungbv pulup rotoku; okv so alu gv lokv bunugv haapok v ho gv pulupnam akin hv pulup rota pvku bunugv aku bv milv kunam kitap a puri riku lokv. So gv pulupnam si mvkok mvngriku vdwlw nyi v Kristo gvlo aapwng minggv rikudw.

<sup>15</sup> Silu dajvka, vdwlw bunu Moses gv Pvbv nga puri ridunv, ho gv haapok a pulup lumam dunv. <sup>16</sup> \*Vbvritola hv mva nyure, darwkvnv kitaplo Moses gv lvkwnglo minam apiabv: “Vdwlw nw Ahtu gvlo gvrwk tokudw ninyia pulup kunamv ngetoku.”

<sup>17</sup> Vjak, “Ahtu” vla minam angv si Dow ngv; okv Ahtu gv Dow ngv ogolo doolwk redw, hoka ajarabi dukunv.

<sup>18</sup> Vbvrikunamv ngonu mvnwnngv nyukmu nga mvtum mabv Ahtu gv yunglit kunam ha unglakaatam puku lage; okv ho gv yunglitnam akin hv, Ahtu gvlokv aanv ngv, hv Dow ngv, ngonua ninyigv aingbv arwnglo aku sudubv mvla kaakwmanam kaiyayabv unggvdu.

## 4

---

**3:13** Mog 34:33 \* **3:16** Bars 16 lo lvkring pvnvpv: vbvritola mvtum namv nyeduku vdwlw nyi gonv Ahtunyi dakrkw kobolo

**3:16** Mog 34:34

*Takam pvchwng arwng lo darwknv yikungyira*

<sup>1</sup> Pwknvyarnv ninyigv aya lokv so kudungkua sum ngonua ridubv jitoku, okv vkvlvgabv ngonu mvngjung suku madu kunv. <sup>2</sup> Ngonu hinyinghirula risiripik kunamgv ridung nga kayu pekunv; ngonu kupdu ridu kubv rima dunv, ngonu Pwknvyarnv gv gamchar a alvmabv mingv rigvma. Pwknvyarnv gv kaagialo ngonu jvjvgv lounglo ridu dakdunv, okv mvnwngnga alvngobv minku dubv vla rikw dunv. <sup>3</sup> Ogulvgavbolo ngonugv Gamlv japkar nam si vvsu dubolo, si ngookunv vdwgv kaagia lokv vvsu kunam gubv ridu. <sup>4</sup> Bunu mvngjwngma ogulvgavbolo bunugv haapok a nyiamooku so gv alvmanv pwknvyarnv ngv Kanvpvram lo vvpv roku. Hv bunua loung ungka nvnga kaapa moma dubv mvtum jiriadu, loung si Pwknvyarnv aingnv Kristo gv kairungnv lvkwnglo Alvnu Yuning lokv aapvnu. <sup>5</sup> Ogulvgavbolo ngonu atungv lvkwnglo japgoma; ngonu Jisu Kristonyi Ahtu gubv japgodu, okv ngonu atuv Jisu gv lvgabv nonugv pakbu gubv ridunv. <sup>6</sup> Pwknvyarnv vbv minto, “Kanvpvram lo loung go ungre!” hv Pwknvyarnv akin hv ninyigv loung nga ngonugv haapok lo ungmu dunv, Kristo gv nyukmu lo unglin mola ngonua Pwknvyarnv gv kainvgobv rila ungnam a chimu dunv.

<sup>7</sup> Rigvrila ngonu gvlo yvvdw so gv dow yikungyira doodunv hv takam pvchwng aingbv ridu, kaiyachoknv jwkrw v Pwknvyarnv gvngv, ngonu gvngvma vla kaatam dubv vbv ritoku. <sup>8</sup> Ngonua hirukaya yayabv himuto, vbvritola

ngoonam gubv amwkamak jedubv riyoma; Lvko gunyi ngonu mvngchi mato, vbvritola vdwloka sanga moma. <sup>9</sup> Ngonugv nyimak v achialvgo, vbvritola ngonu vdwloka ajin kaamabv rima; okv ngonua achidubv mvdv-mvdv jeka, ngonua mvki mato. <sup>10</sup> Dw mvnwn glo ngonu sikujinv ayak amar so Jisu gv sinam a gvla redunv, ogulvgavbolo ninyigv turnam hvka ngonugv ayak amar so kaapanam gubv rimunam lvgabv. <sup>11</sup> Jisu gv lvgalo ngonugv singnam mvnwn glo alu gv dwkia maatarbv sinam gubv ridunv, ogulvgabv ninyigv turnam v ngonugv sijikunv ayak amar so kaapa mokunam lvgabv. <sup>12</sup> Svbv minamsi sinamv ngonu gvlo kudungkua ridu, vbvritola turnam v nonu gvlo kudungkua ridu.

<sup>13</sup> Darwknv kitaplo mindu, “Ngo mindunv ogulvgavbolo ngo mvngjwngdu.” Ho mvngjwng akin gv dow lokv ngonuka mindu ogulvgavbolo ngonu mvngjwngdu. <sup>14</sup> Ngonu chindu Pwknvyarnv, Ahtu Jisu Kristonyi turrapp mokunv, hv Jisunyi lvkobv ngonuaka turrapp more, okv ngonua nonugv lvkobv ninyigv dookulo naala vnggv reku. <sup>15</sup> So mvnwn glo sum nonunogv lvgabv ripvnv; ogulvgavbolo Pwknvyarnv gv aya ngv kaiyayabv riku lokv nyi vdww vbv Pwknvyarnvnyi mintv hartvla umbonyikv vla kumreku.

### *Mvngjwngla singnam*

<sup>16</sup> Vkvlvkwngbv ngonu mvngju sima dunv, ngonugv ayak hv ngooya yaya jeka, vbvritola ngonugv dow gv singdung ngv lokia anw yayabv

ridunv. <sup>17</sup> Okv so gv doobwngjimanv okv achukgo adwkaku hirukaya hinam si ngonua doobwngjin v okv kairungnv yungnam gubv naalwk jiyare, hv adwkaku nga achialvbv kaiyanv goku. <sup>18</sup> Ogulvgavbolo ngonu kaapanam yikungyira lo mvnggap madunv vbvritola kaapa manam lo mvnggap yadunv. Kaapanam yikungyira si ayung madunv, vbvritola kaapa manam yikungyira si dvbvsvngtambv doobwng yadunv.

## 5

<sup>1</sup> Ngonugv ayak si sichingmooku so tombunaam lo doonam aringnv. Vbvritola vdwlo so tombunaam si ayak apak rikudw, ngonu chindu Pwknvyarnv ngonua doomu dukubv tolo dooku a jire. Hv naam hv nw atubogv mvnamv okv dvbvsvngtambv doobwngre. <sup>2</sup> Okv vjak ngonu sagwngdu, ogulvgavbolo nyidomooku tolo gv inv naam ha ngonu achialvbv koonwng yadu; <sup>3</sup> ngonu ayak abin manam lvgabv um vji jbv kooriku. <sup>4</sup> Sichingmooku so tombunaam lo doorinyi, ngonu mvngdwk sakdwkla svgin gindu; ngonugv svbv rigvnam si Sichingmooku so rigvdogvnnv awamar sum ria sinvpv vla rima, vbvritola nyido mooku tolokv aanv nga ngonu pilwk sinwngdo, vbvribolo ogu vdw ngonua sigv yaagvnnv amar v hv turbwngnv ayak amarbv mardik reku. <sup>5</sup> Svbv mardik nam sum ridubv riria dunv Pwknvyarnv akin v, okv nw ngonugv lvgabv achialvgo vvpv jirung pvnv vla kaatambv ninyigv Dow nga ngonua jitoku.

<sup>6</sup> Vkvlgabv ngonu alu gv dwkia achialvbv mvn-grw dunv. Ngonu chindu vdwgo ayak amar

lo doobwng redw ngonu Ahtu gv naam lokv adu dunv. <sup>7</sup> Ogulvgavbolo ngonugv turnam si mvngjwng kolokv turdunv, kaaku lokvma. <sup>8</sup> Ngonu achialvbv mvngrwdu okv ayak amar naam sum kayu tola okv Ahtunyi lvkobv naam lo doonwng yadunv. <sup>9</sup> Ngonu ngonugv naam so jeka okv tolo jeka ogumvwnwng nga kaiyabv ngonu ninyia mvngpu modubv rinwng dunv. <sup>10</sup> Ogulvgavbolo ngonu mvnwngngv Kristo gv kaagialo daklin rungre, ninyia jwngkadaka kodubv. Tanyi amarbv turla singrilo, alvvnvgo ripvdw vmalo alvmanv go ripvdw, ho rinam gv rijo paase nga, ngonu akin-akin v naarwk sireku.

*Kristo gvlokv Pwknvyarnvnyi lvkobv ajin kuanam*

<sup>11</sup> Ahtunyi busu svngv ogvdw ngonu chindu, okv ngonu um kvvbi vdwaka minpa minsidu. Pwknvyarnv ngonu mvnwngnga chimedu, okv ngaaka nonunogv haapok lo alvrungbv chindu vla ngo mvngtindu. <sup>12</sup> Ngonu lvkodv nonua alvngobv mvngku dubv atubogv lvkwinglo minpa dubv rikwma; vmabvya, ngonu nonua alvvnv ogugo jiyala ngonua hartv modubv rikw yadunv, hv vkvlgabv nonuno nyi a arwng lokv kaamabv agum lokv kaala goonv nyi vdwa mirwk sinyu dubv. <sup>13</sup> Ngonu jvjvbv suru rungdure? Hv Pwknvyarnv gv lvgabv ridunv; vmalo ngonu alvyaung nvgobv ridure? Vbvribolo hv nonunogv lvgabv ridunv. <sup>14</sup> Kristo gv paknam lokv ngonua rigvdogvdu, vjak ngonu kaachin duku, nyi akonv mvnwng gv lvgabv siria jipvku, ho hv minrinyi

mvnwnngv ninyigv sinamlo akin gubv simin gvta dunv. <sup>15</sup> Nw mvnwnng gv lvgabv siria jitoku, vkvlvgabv vrinyi yvnbunudw turdukunv hv bunu atunvgv lvgabv svngsu madu kubv, vbvritola yvvdw bunugv lvgabv siji laku okv turjikunv gv lvgabvya svngji yadukubv.

<sup>16</sup> Vbvrikunamv ngonu vdwloka nyi tanyi ako vla jwngkadaka madu kunv. Ngonu lvko Kristonyi nyi tanyi akobv jwngkadaka toku, vjak ngonu vbv riku madunv. <sup>17</sup> Yvvdw Kristo gvlo aapwng dukunv hv anwnv nyi vku; aku hv vngroku, anw hv aapv kunv! <sup>18</sup> So mvnwnng sum Pwknvyarnv ritoku, ngonua ninyigv nyimak bv rinv nga Kristo gvlokv ngonua ninyigv ajin gubv mvpvkunv, okv ngonua kvvbi vdwaka ninyigv ajin gubv mvdukubv rise nga jita pvkunv.

<sup>19</sup> Ngonugv doinv Kristo\* gvlokv Pwknvyarnv nyia nyi mvnwnngnga ninyigv ajinbv mvdukukv vnamgo. Pwknvyarnv bunugv rimur a kila vvpv kuma dukunv, okv ninyigv doin jinamv nw bunua oguaingbv ajinbv mvdukudw ho gv lvkwngbv minpa nvgoku. <sup>20</sup> Vbvrikunamv so ngonu Kristo gv nyitampingko ngv, ngonugv lokv Pwknvyarnv ninyigv dinchibv koonam a ripvku. Ngonu Kristo gv lvgabv minria jidunv: Pwknvyarnv nonua nyimak loka ninyigv ajin gubv mvdin lakuka! <sup>21</sup> Kristo rimur kaamanv, vbvritola ngonugv lvgabv Pwknvyarnv ninyia ngonugv rimur a gvvria motoku ogulvgavbolo ninyia akin gubvrila ngonu Pwknvyarnv gv darwkchongjor a naala

---

\* **5:19** Pwnvyarnv nyi vdwa ninyigv ajinbv mvtoku kristogv lokv; Vmalo Pwnvyarnv Kristolo doto nyi vdwa ninyigv ajinbv mvto

nyudukubv.

## 6

<sup>1</sup> Vbvrikunamv ngonugv lvkobv Pwknvyarnv gvlo kudungkua ribam kolo, ngonu nonua dinchibv mindunv, yvvdw Pwknvyarnv gv anyubv aya jinam a naarwk sudunv hv ung anyung kaamanvgobv rimu mabvka.

<sup>2</sup> Pwknvyarnv ogugo mindudw tvvtoka:

“Vdwlo nonua ngoogv kaiyabv aya kaatamd w hv aatokudw,

ngo nonua tvvji toku;

vdwlo nonua ringlindw hv aatokudw

ngo nonua ridur toku.”

Tvriato! Siinv Pwknvyarnv gvlo kaibv aya nga naarwk sidw hv; silugv alu si ringlinbalindw alu hv!

<sup>3</sup> Ngonu yvnyika ngonugv kudungkua rikulo alvmanv go kaapa mosu mvngma, vkvlgabv ngonu akonvgv lamtvlo adwkaku go mvlwk rilwk madubv vla rikw dunv. <sup>4</sup> Vmabvya,

ngonugv rinam mvnwglo ngonu Pwknvyarnv gv pakbu gubv ngonu kaatam sila adwkaku ha, hirukaya nga, okv rinyu manam dvdv nga hinla saktv sidula ridungdunv. <sup>5</sup> Ngonua dvngtoku,

patwklo tumtoku, okv nyitwng ngv goyum nyato; ngonua kudungkua rilv yamuto okv dvnam guma jeka yupnam guka paamabv ripvkunv.

<sup>6</sup> Darwknv Dow lokv, ngonugv jvjvnnv paknam lokv; ngonugv darwk kolokv, chinampaanam a, saktv nga, okv aya nga Pwknvyarnv gv pakbu gubv kaatamsula ripvkunv, <sup>7</sup> ngonugv jvjvnnv doin

lokv, okv Pwknvyarnv gv jwkrw lokv. Ngonu gvlo darwkchongjor hv yidu gubvrila baanyi gubv ridu, mvmisin v dubv okv atubongv mvngging sunvdubv. <sup>8</sup> Nyi kvgonv ngonua mvngdvtv okv kvgonv ngonua minying toku; ngonua miyakayato okv hartvtv. Ngonua mvvnvrurv gubv minyato vbvritola ngonu jvjv nga mintoku. <sup>9</sup> Chimpa manam aingbv rito, vbvritola ngonuv mvnwng gv chinkunam; ngonu sikunv aingbv rito, vbvritola, nonuv kaadu, ngonu turla svngdu. Mvrit kubvka, ngonua mvki kuma; <sup>10</sup> mvngdwk dubv mvku bvka, ngonu lokia mvngpu toku; ngonua heemanv aingbv kaato, vbvritola ngonu nyi achialvgo nyitv dubv mvdu; ngonu oguguka kaamanv aingbv kaato, vbvritola ngonu jvjvbv ogumvnwng nga doogvdu. <sup>11</sup> Aya sinam ajin vdwa Korint lo doonv! Ngonu nonua minkak milak jipv kunv; ngonu haapok sin a kokdariaka jipv kunv. <sup>12</sup> Nonugv lvgabv ngonugv haapok ka mvtum nvngv ngonuma; nonunogv haapok vdwa ngonugv lvgabv nonu mvtum yato. <sup>13</sup> Ngo vjak nonua ngoogv kuu jvbv mindu: nonugv lvgabv ngonugv mvngnam apiabv nonuka mvngla ngonua kaatam tvkuka. Nonugv haapok a kokdariaka tvkuka!

*Pwknvyarnvnyi chimanv vdwa nyokku nvnga gamrwnam*

<sup>14</sup> Mvngjwng manv vdwa karingchingbv lvkobv kudungkua ribam dubv rikw mabvka, ogulv-gavbolo hv rilamarung sv-ngv. Jvjv nvngvla jvjv manv ngv oguaingbv akin nyudubv? Pua ngvla kanv ngv oguaingbv akin gubv doobam nyudubv?

15 Oguaingbv Kristo la Uyudvbv ngv tolwk minsu ladubv? Mvngjwngnv ako mvngjwng manv anga akin namv oguv? 16 Pwknvyarnvnyi kumging naam hv oguaingbv Pwknvyarnvnyi chima nvgv kumnam morti vdwa akin nyudubv? Ogulvgavbolo ngonuv turnv Pwknvyarnv gv kumging naam mv! Pwknvyarnv atubongv vbv mintoku: “Ngo ngoogv naam a ngoogv nyi vdwa lvkobv mvre

okv bunua lvkobv rireku;  
ngo bunugv Pwknvyarnvbv rireku,  
okv bunu ngoogv nyi bv rireku.”

17 Okv vkvlvgabv Ahtu mindu,  
“Nonuno bunua kayu runcto kuka  
okv nonu atubongv bunu vdwa akusubv resu daksu tokuka.

Darwkmanv vdwa lvkobv kudungkua rimabvka,  
okv ngo nonua torwk sireku.”

18 Kaiyachoknv Pwknvyarnv vbv mindu,  
“Ngo nonunogv abu bv rireku,  
okv nonuno ngoogv umv okv uu vdwbv rireku.”

## 7

1 Ngoogv ajin vdwa sogv milvvnam mvnwng sum, ngonugv lvgabv mvpvkunv. Vkvlgabv ngonu ngonugv ayak hala yalu a darwk madubv mvnv vdwa adu minsu lajuka. Ngonu Pwknvyarnvnyi mvngdv rungla okv singdung nga darwk dubv svngla juka.

*Paul gv himpunam*

<sup>2</sup> Ngonugv lvgabv nonugv haapok vdw ho dookudakku go mvji labvka! Ngonu yvvnyika rigakpanam go kaama; ngonu yvvnyika ngoomu namgo kaama, vmajvka yvvnyika dvkup namgo rikwma. <sup>3</sup> Ngo sum minam si nonua mia dubv mima; ngo kvvlo mincho toku, sikujeka vmalo turku jeka nonuno ngonugv aya minsunam gubv ridu. <sup>4</sup> Ngo nonua achialv bv jvrv rungbv mvngdunv; ngo nonua vbv googing dunv! ngonugv adwkaku mvnwnglo ngo vjaklodv bv achialv bv mvngrw mindunv; ngo kaiyaje bv himpu mindukunv.

<sup>5</sup> Ngonu Mesedonia lo vngchi kubvka, ngonu doonu dubvka paama. Hoka adwkaku yayabv rila, kvvbi vdwv yalung dumin sinya laku, ngonugv haapok lo busubv ritoku. <sup>6</sup> Vbvrítola Pwknvyarnv nw haapok a mvngamvngja la doonv nga mvngrw dubv mvnvngv, Taitasnyi aamula ngonua mvngrw mopvkunv. <sup>7</sup> Ninyigv aanam mvngchik lokv ngonua mvngpu dubv mvtwkma, vbvrítola ninyia nonu oguaingbv mvngrw dubv mvpv nvdw um ninyigv ngonua minpanam lokv ta. Nw ngonua minpa toku nonu nga achialv bv kaanwng duku vla, nonu oguaingbv mvngkor pvkudw, oguaingbv nonuno ngam ringria dubv dooya dukudw; okv vkvlgabv ngo vjak achialv bv mvngpu puya yaya dunv.

<sup>8</sup> Ngoogv siti lvkku lokv nonua mvngdwk mopv boloka, ngo ho siti lvkwngbv mvngkur madunv. Ngo mvngkor dubv rin v guilo nonua achukgo mvngru dubv kaari hoka mvngkor dunv pyi. <sup>9</sup> Vbvrítola vjak ngo mvngpu

duku, hv ngo nonua mvngru motobv vnam lokvma, nonunogv mvngru laila mvngdin kunam lokv. Ho mvngru angv hv Pwknvyarnv gv rinu nvnamgo, vkvlgabv ngonu nonua alvmabv rinam go kaama. <sup>10</sup> Ogulvgavbolo Pwknvyarnv mvngru ha rinvnvla haapok a mvngdin mola Ringnambaanam paamu yadunv—okv ho mvngkor kuse kaama! Vbvritola Nyi gv rinvnvnam mvngruv sinam a paamu dunv. <sup>11</sup> Kaatoka nonunogv mvngrua Pwknvyarnv ogugo ripvkudw: vdwgo mvngdok rungnv gubv si nonua mvtoku, nonunogv nyingum pvtvr a vdwgo kaatam nwnngduku! Vkvnv mvngdwk, lammunam, vkvnv hinam, mvnglwkinam, rimur nvnga mvrit dubv doyanam! So gv ugu mvnwnng so nonua rimur manv gubv kaatam rimu toku.

<sup>12</sup> Vkvlgabv, ngo ho gv siti a lvkdaka, hv rimur rinu gv lvkwngbv vmlalo rimur monv gv lvkwngbv lvkyama. Vmnbvya um ngo nonua chimpa moya dubv lvktoku, Pwknvyarnv gv kaagialo, nonugv ngonua tolwk sunam doonam mv vdwgo rungrwnng dukunv um kaatam yala ripvnuv. <sup>13</sup> Vkvlvkwngbv ngonua mvngrw mopvnuv. Ngonua hv mvngchik mvngrw moma; nonunogv Taitasnyi ridur laku mvngpu monam lokv ninyigv vbv mvngrw kunam lokv ngonuaka achialvgo mvngrw mata pvku. <sup>14</sup> Nw gvlo ngo nonua hartv toku, okv nonuno nga mvngngamvngja momato. Ngonu lokia nonua jvjv nga minbwng jitoku, vkv aingbv ngonugv Taitasnyi hartv kunamv jvjv dukunyi vla kaapa moduku. <sup>15</sup> Nonuno ninyia busula okv jinjinrumrum tola naarwk sunama, okv ninyigv

minggap nama tvduridubv nonugv doya nama vdwlw mvngpa tokudw ninyigv haapok lo nonugv aolo ninyigv aya ngv haatin yaya duku. <sup>16</sup> Ngo achialvbv mvngpu duku nonua ngo ogumvnwng nga mvngtin nyula kunamv!

## 8

### *Kristan jinamrumnam*

<sup>1</sup> Ngonugv ajin vdwa, ngonu nonua Mesedonia gv gvrja vdwlw Pwknvyarnv gv aya lokv ogungvgo ripwnggrinya mopv kudw um chimu nwnghu. <sup>2</sup> Bunu pokayarka lo maatarbv adwkaku hirukaya hinyato; vbvritola bunugv mvngpu v kainvgobv rinam lvgabv bunu dvma heema nvgobv ri-jeka jinamrumnam lo achialvbv jinwng nyala jitoku. <sup>3</sup> Ngo jvjvbv mindunv bunugv vdwgo jila pvdw jito okv humka kaiyagobv jinya la jitungu. <sup>4</sup> Bunugv mvnggwngbv mvnglin sunam lokv bunu ngonua, Judia lo doonv Pwknvyarnv gv nyi vdwa ainmorko jidur minggv dubv rimu labv vla dvku koto. <sup>5</sup> Atukchobv bunu atuv Ahtu gvlo tolwk choto, okv ho kochingbv Pwknvyarnv gv mvngnam lokv bunu ngonu gvlo tolwk toku, hv ngonugv mvngtin a kaiyanv gubv ritoku. <sup>6</sup> Vkvlgabv Taitasnyi, so gv paknam rinam gv kudungkua sum rirap gvnv, nonua ridorla alvbv ribv la ripirinya gvlakv vla ngonu mintvmiru dunv. <sup>7</sup> Nonuno ogumvnwnglo nyitv nvgobv ridunv: mvngjwnglo, japnamrinam lo, okv chinampanam lo, nonugv ridurdubv koosanam okv

ngonua paknam rinam lo.\* Okv vkvlgabv ngonu nonuaka so gv pakmi sinam kudungkua so jinwng rumnwng nvgobv rita tvka vla mvngdunv.

<sup>8</sup> Ngo nonua pvbv lvkla mima dunv. Vbvritola kvvbi vdww achialvvv jinwng rumnwngla ridukv vla kaatam dunv, nonunogv paknam mv vdwwgo jvrv pvdw um kaalin dubv vla ngo rikw dunv. <sup>9</sup> Nonuno Ahtu Jisu Kristo gv anyubv aya nga chindu; vdwwgo nyitv nvgobv ripikula, vkvgo nonugv lvgabv dvma heema nvgobv mvsutoku, vkvlgavbolo nw gv dvma heema lokv nonua nyitv kunam lvgabv ritoku.

<sup>10</sup> Ngoogv mvngnam v vbv mvngdu mvnying nonuno ogugo rirap pvkudw um vjak rinya chotoka. Nonuno richonv vdww, ridubv rimwngma, vbvritola ridubv rinwng nvngvka nonu. <sup>11</sup> Vbvrikunamv, hokv rirapla vjak ridung nga rinya tokuka! Nonu oguaingbv rinwngla rirap pvdw, vbvching rinwngla rinya tokuka, okv vjak nonu ogugo doodudw hokv rinv tvka. <sup>12</sup> Nonu jinwng dubolo, Pwknvyarnv nonugv ogugo doola jidudw hoogv jinam amin lokv torwk sire, nonugv doomanam a mvngmare.

<sup>13</sup> Ngo kvvbi ha haajup modubv vla nonua ainv vgego gvmu rimu madunv; <sup>14</sup> Vbvritola vjak nonuno ajeaye duku, vbvriri so kaamarimanv vdwa nonu kaadurridur dubv ridu. Vbvrikubolo vdwwlo nonu kaamarima rikudw okv bunu ajeaye dookubolo, bunu nonuaka ridurkaadur riku. Vbvrila anyiv lvin akin kvlam gubv rimi sulare. <sup>15</sup> Darwknv kitaplo mindu, “Yvvdw achialvgo

---

\* **8:7** nogv ngonua paknam a; Megonv kitaplo doodu ngonugv nam paknam a. **8:15** Mog 16:18

naakum pvnv hv achialvgo dooma toku, okv yvvdw miang go naakum pvnv hv achialvbv miang go dooma toku.”

*Taitas okv Ninyigv richam vdwv*

<sup>16</sup> Ngonugv nonua ridurdubv koosanam aingbv Taitasnyi koosa monv Pwknvyarnvnyi ngonu achialvbv umbonyikv vdunv. <sup>17</sup> Nw ngonugv dinchikochi bv minam a alvbv naarwk sula rimwngma; nw achialvbv koosala nw gv rinwng kolokv nw nonu gvlo vngdubv tolwk sutoku. <sup>18</sup> Ninyigv lvkobv ngonu achiboru go gamlv japkar kolo gvrja mvnwng gv achialvbv mvngdv kunam go vngmu dunv. <sup>19</sup> Okv ho gv aolo, nw gvrja mvnwng gv ngonugv vnggo kolo vngmin gvmu dubv darlin kunam mv vbv ngonugv pakmi sunam ridung nga Ahtunyi yunglit monam lvgabv okv ngonu ridur nwngdunv vla kaatamnam lkwngbv.

<sup>20</sup> Jinwngla jinam sum ngonugv kaayataya nama minkurminrwk namgo rimu madubv vla ngonu himakaya sidunv. <sup>21</sup> Ngonugv mvngnam jvngv jvjv nga ridubv vla, Ahtu gv kaagia lomwngma, vbvritola kvvbi vdwgv kaagia lota.

<sup>22</sup> Vkvlgabv ngonu achiborunyi bunua lvkobv vngmu gvrinv; ngonu ninyia achialvbv hingkwkaakw laku ninyia ridorlo koosa nvgobv kaalin pvkunv. Okv vjak nw nonua achialvbv mvngtindu, okv mvnwngnga kaibv ridur yanvpv vla mvngsudu. <sup>23</sup> Taitas gvbv vrinyi, nonua ridurnam lvgabv nw nga lvkobv kudungkua

richam v; ninyia vngming gvnv kvvbi achiboru vdwa minrinyi, bunu gvrja gvbv vngria jila okv Ahtu Kristo gv amina kaiyaya modunv. <sup>24</sup> Nonugv lvkwngbv ngonugv goola minamv minching go vla gvrja mvnwngnga chimu kunam lvgabv nonugv paknam a bunua pakla kaatam tolaka.

## 9

### *Kristan ajin vdwa ridur minsunam*

<sup>1</sup> Judia lo Pwknvyarnv gv nyi vdwa ridur go jiku nama ngo nonua ho gv lvkwng nga lvkse go kaama. <sup>2</sup> Ngo chindu nonu ridurdubv koosa nyatoku, okv ngo nonua Mesedonia gv nyi vdwgvtvgia kaagia lo gooji toku. Ngo mintoku, “Akaia lo mvngjwngnv vdwv mvnying gv lokv ridurdubv vla dooya nyapvkunv.” Nonugv koosa namv twngtv yanv nga mvar nyapvkunv. <sup>3</sup> Vjak ngo achiboru vdwa vngmu gvrinvla, vkvlgavbolo ngonugv nonua so lvkwnglo goonam mv gamchar nyumchikbv rila arochoko madubv. Vb-vritola vjak ngo mintobv, nonu ridur ha lvvmu sila dooto laka. <sup>4</sup> Ogubvrijeka, Mesedonia gv nyi vdww nga lvkobv vngming gvla nonua lvvmu madubv kaapa kubolo, ngonu achialvbv hinyingnam gubv rireku–nonuka kaiyabv hinying reku–nonua riji rungre vla achialvbv mvngtin kunamgv lokv! <sup>5</sup> Vkvlgabv ngo mvngtoku so gv nyi vdwa mintvmiru gvrila ngam vngcho yamure okv nonugv amin jinvpv vla milv kunam ha lvvmu yadukubv. Vbvrikunamv vdwlo ngo aachi rekudw hv mvkimvak pvla doodu kubv, okv hv

nonugv jise gubv rimabv nonugv jinwngla jinam gubv kaamu dubv.

<sup>6</sup> Mvnggap tvlaka yvvdw ali ha miang go lilwk dunv hv miang go paamwng duku; yvvdw ali a kaigo lilwk dunv hv kaiyago paadu kunv. <sup>7</sup> Vbvrikunamv nonuno nyichar mvnwngngv atu-atugv jidubv vla mvngku lokv jilaka, mvngkurla vmalo jinwng mato laka jila riyoka, vkvlgavbolo Pwknvyarnv mvngpula jinv nga pakdunv. <sup>8</sup> Okv Pwknvyarnv nonugv dinchi nama kaiyanvgo jila dunv, vkvlgavbolo nonuv dinchinam mvnwngnga atuv lokia anginmabv doosu dukubv okv alnv rinampanam mvnwnglo kaibv riladubv paare. <sup>9</sup> Darwknv kitaplo vbv mindu, “Nw dvmaheemanv vdwa alvbv jidu; ninyigv aya ngv dvbvsvngtambv doobwngnv.” <sup>10</sup> Okv Pwknvyarnv ali linv nga ali nga jinv okv dvnam a dvdubv jidunv, nonugv ali dinchi nama jiriare okv kaibv naakum dukubv svngmula okv nonugv jipubv jinam gv lokv kaigo apwasia naaching moreku. <sup>11</sup> Nw nonua lokia nyitv dubv mvla mvnwnglo jinwng nvgobv mvre, vkvlgavbolo bunu ngonugv lokv nonugv amin jinam a naarwksuto kula mvnwngngv Pwknvyarnvnyi umbonyikv vreku. <sup>12</sup> Nonugv svbvrinam si Pwknvyarnv gv nyi vdwgv pwma risu nvnga pdubv rimwngma, vbvritola mvnwngnga achialvbv Pwknvyarnvnyi umbonyikv vla rimu dubv ritadu. <sup>13</sup> Okv nonugv ridungripa riku lokv kaatam sinam lvkwngbv, Kristo gv doin a dinchinam lvkwnglo, Pwknvyarnv gvlo rimur

a minji sunam lvkwngbv okv nonugv bunua okv nyi mvnwnglo jinwng rumnwngbv jiku lvkwnglo, nyi achialvgo Pwknvyarnvnyi hartv nyari. <sup>14</sup> Okv nonua Pwknvyarnv gv akusubv aya kaatamnam lvkwngbv bunugv haapok sin mvngrum ara lokv dinchikochi tola nonu lvgabv kumji nyare. <sup>15</sup> Ninyigv arv koomabv amin jikunam so lvkwngbv klai ngonu Pwknvyarnvnyi umbonyikv vlaju.

## 10

### *Paul ninyigv ridungripa nga ringsunam*

<sup>1</sup> Paul ngo, vdwlo nonua lvkobv ribamdakbam redw—goyunv bv okv nyaknyinbv, vbvritola vdwlo nonugv lokv adu rikudw nonua tvrukaya bv minnv ngv. Kristo gv angampvtar okv aya lokv nonua lvbula mindunv, <sup>2</sup> ngo nonua koodwkkwkla mindunv vdwlo ngo aaridw nga haak moma bvka; ogulvgavbolo ngo jvjvbv mindunv yvvdw ngonua tanyi mooku gvbv mvngla ridunv vnv vdwa ngo haakdar minsu lare. <sup>3</sup> Si jvjv ngvrung doonam gvbv ngonu tanyi mooku si doorung dunv, vbvritola ngonu tanyi mooku gvbv mvngla padarminsu madunv. <sup>4</sup> Ngonugv pamisinvv yiduv tanyi mookugv yidu ma vbvritola Pwknvyarnv gv kairungnv jwkrw gv yiduv, hum ngonu bvngtola toodvng mvnam haka mvyak dunv. Ngonu mvnamrunam larnam a mvyak dukunv; <sup>5</sup> Pwknvyarnvnyi chinampanam gv lvkwng nga mintor yala, rinv nga ngonu tungtuptungrup dunv; okv mvnwng gv mvngnamsaknam a ngonu naatungla Kristo gv mvnglwkbv tvdu ridu kubv

mvdukunv. <sup>6</sup> Okv nonugv dinchibv mvngdi kuanam a kaatamro kochingbv, ngonu yvvbunudw mvngdi kaadila rima dunv hum ngonu mvrit dubv dooyare.

<sup>7</sup> Nonuno agumai gv yikungyira vdwa kaadu. Ayak amar a Kristo gvngv vla akin go mvngsu nvgo doodure? Alvdo, bunua lvkodv atugv lvkwngbv mvngdi sila mvngka motoka, ogulvgavbolo bunugv rinam apiabv ngonu Kristo gvngvku. <sup>8</sup> Ahtu gv ngonu gvlo nonua rigv modubv jwkrw jinamv, nonua mvyakmvchak dubvma, vbvritola nonua mvdin mvbiala singmu yadubv jinamv. Okv ngonua rigvdogv ladubv jwkrw jinam gv lvkwng haka ngo achargo gobogoyik jeka, um ngo achar guka hinying bv mvngsuma. <sup>9</sup> Ngo siti lvkku sokv nonu v ngam busukano go doomu dubv kaatam nvpv vla mvngma. <sup>10</sup> Ako nvgonv minre, “Paul gv siti lvknam mv achialvbv haachihaak nambv ridu, vbvritola vdwlo nw ngonua nyidumbv lvkobv ribamdobam redw, nw goyu nvgobv ridu, okv ninyigv minam gaam vdwv oguguka kaama.” <sup>11</sup> Vkvnv nyi hv chirung tvlaka vdwlo ngonu adulo retola ngonu siti bv lvkdudw okv vdwlo ngonu nonua lvkobv ribamdobam tvla riredw vbvrinam ho ogu akusunv go kaama.

<sup>12</sup> Vbv rilado kaiyachok nvgobv mvngsu risula rinv vdwa ngonu atubongv aku-aku subv vmalo atubongv kiiring sula madunv. Bunu achialvbv pvchado! Bunu atubongv mvsurisula atua kiiring sunyado okv bunu atubongv gv kaapu tain lo jwngkadaka sunyado! <sup>13</sup> Ngonu gvbv, ogubv rijeka, goonam a mvrw rirw kolokv ribo nyula-

mare; so si Pwknvyarnv gv ngonua vbv rilakv vla kudungkua jirw jipala jinam lo doore, okv si nonua lvkobv kudungkua ribam namaka minta dunv. <sup>14</sup> Okv nonuno vbv arwrwnam gv arwng lo doodu, vdwlo ngonu nonu gvlo aarilo ngonu ho bunua ribo vngbo matoku, Kristo gv lkwng Alvny Yuning nga bvnglwk jiri lo. <sup>15</sup> Vkvlgabv Pwknvyarnv gv ngonua kudungkua jirwnam lo kvvbi vdwv ribo richakla rikunam gv lkwng nga ngonu goosu madunv. Vmabvya, ngonu mvngtindu nonugv mvngjwng ngv kai yayare okv ngonu nonua lvkobv ribamdobam la kainv kudungkua go rinyu yare, alu gv dwkia Pwknvyarnv gv jirw jipa kolo doodula. <sup>16</sup> Vbvrikunamv ngonu nonua vngboyala kvvbi mooku vdwlo Alvny Yuning nga japkar lado okv ako gunv gv mooku lo kudungkua riro kunamgv lkwng nga gookwng kumare. <sup>17</sup> Vbvritola Darwknv Kitaplo vbv mindu, “Yvvdw goorung dubv mvngdunv hv Ahtu ogugo ripvkudw ho gv lkwng nga goorung laka.” <sup>18</sup> Vkvlgavbolo vdwlo Ahtu ngonua alvbv mvngridw vbvritolo hv ngonua jvjvbw torwk sidukunv, okv ngonugv atuv alvnvobv mvngsunam lokvma.

## 11

*Paul okv mvnvrnunv apostol vdwv*

<sup>1</sup> Nonuno ngam vbv rijilabv! vdwlo ngo achukgo pvcha nvngobv rijeka, nonuno ngam saktv mingv laka. <sup>2</sup> Pwknvyarnv gv apiabv, ngo nonu lvgabv kavtarv dunvla; nonuno

ngoogv darwknv nyijar gonyi yaapa akolo mingak jidubv milv kunam jvbv ridu, hv yaapa angv hv Kristo atubongv. <sup>3</sup> Iyip nyi tabw gv mvvlarula kupnam aingbv, nonunogv haapok haka mvngmur mola okv Kristonyi darwkbv dinchibv mvngjwng sunama kayu mojila vla ngo busudu. <sup>4</sup> Ogulvgavbolo ngonu nonua Jisu gv lvkwng nga jappi toku, okv nonu Darwknv Dow nga naarwk sutoku okv ngonugv doin a nonu torwk sutoku vbvripikula um kayu tokula; nonuno kvvbinyi mego dvbv Jisu go nonua jappi kodu. Vjak nonu kvvbi dow go naarwk sidu kubv okv kvvbi doin go torwk sidu kubv mvngpula doya duku. <sup>5</sup> Nonugv maatarbv alvyaungnv kainv apostol vdwv vla minam vdwa ngo mvngkw namv ngo achok goka miang yadunv vla mvngsuma. <sup>6</sup> Ngo gaam raakulo jwknam kioknambv raachin riama dvnvppv, vbvritola chinampanam lo ngooka kai nguru pvnv; dw mvnwnvlo okv svngkuriku mvnwnvlo ngonu sum nonua minbwk jipv kunv.

<sup>7</sup> Vdwlo ngo nonua Pwknvyarnv gv Alvrv Yunying nga jappi rilo ngo nonua jappo rijo go minma; nonua alvngobv rimuto mvngla ngo nyaknyi yala ritoku. Hv ngo rimur go ripvi? <sup>8</sup> Ngoogv nonua lvkobv ribamla kudungkua ririlo, ngam kvvbi gvrja vdwv rijo nga joriatoku. Hv minri kunyi, nonua ridurnam lvkwngbv bunugv lokv dvrit namgo. <sup>9</sup> Ngoogv nonua hoka ribam doobam rilo ngoogv morko ain pwma nama ngo nonua mindwkminku matoku; Mesedonia

lokv mvngjwngnv vdww ngoogv dinchinam mvn-wngnga jiria toku. Vngroyinv aingbv, aarinv tolo jeka: ngo vdwloka nonua vge gubv mvlwk mare! <sup>10</sup> Kristo gv jvjv ngv ngoogvlo doonam lvgabv, ngo milvla mindunv Akaia mooku mvn-wnglo ngoogv goonam v choibv doya mare. <sup>11</sup> Ngo nonua pakmanam lvkwngbv ngo svbv minduai? Pwknvyarnv chindu ngo nonua pakdunv!

<sup>12</sup> Ngo vjak ogugo ridudw sum ngo ribwn-gre, ho gv kvvbi “apostol” vdwa ngonugv rinam apiabv bunuka ridu vla goonv vdwa mvtor sunam lvkwngbv. <sup>13</sup> Ho nyi vdww jvjvnv apostol ma—bunu mvvnvrurv apostol vdww bunu mvvlarula kudungkua ridunv okv bunu atu v Kristo gv jvjvnv apostol aingbv kaadunv. <sup>14</sup> Alvdo, mvngngak svgo kaama! Uyu hvka atuv loung gv nyido gindung jvbv ridunv. <sup>15</sup> Vkvlgabv ninyigv pakbu v bunu atuv jvjvngv pakbu gubv kaadubv mvsu duboloka hv si kairungnam go rima. Ataranya alu lo bunugv rinampanam a bunu paasureku.

### *Paul Apostol gubvrila hirukaya kunam*

<sup>16</sup> Ngo mindvdu: yvvka ngam pvchanv akobv mvngrung mabvka. Vbvritola nonu vbv mvngdu bolo, mama vjvka ngam pvchanv akobv torwk sulaka, ngo achukgo goosu ladubv. <sup>17</sup> Rinam gvbv ngo vjak ogugo mindudw Ahtu gv mintoka vla minku lokv minma; svbv kaibv goosunam so kaarinyi ngo jvjvbv pvchanv aingbv mindu. <sup>18</sup> Vbvritola nyi achialvgo hoka tanyi amar gv mvngtung lokv goosudu, ngo ka hvkv apiabv rire. <sup>19</sup> Nonu atubongv achialvbv chinvpanv gubv ridu,

okv vkvlvgabv nonu mvngpula pvcha nvnga saktvdu! <sup>20</sup> Nonua orto jila vmalo rinu nvminla vmalo kupkula vmalo kaanyetalo koola vmalo no gv nyukmua svbiaknam aingbv riku tvla, nonuno saktv nyadu. <sup>21</sup> Ngonu vkvnuv ridung nga rikulo richin nyuyama vla minse nga ngo hinyingdo! Vb-vritola akonv vkvsekv gv lvkwngbv busu kaam-abv goosu bolo—ngo pvchanv jvbv mindunv—ngonuka vbvriila mvngpakla goosu ladu. <sup>22</sup> Bunu Hebru ngvdw? Ngooka hv. Bunu Israel nyi ngvdw? ngooka hv. Bunu Abraham gv husi ngvdw? ngooka hv. <sup>23</sup> Bunu Kristo gv pakbu vdw? Ngo surunv jvbv mindu—vbvritola ngo bunua alvyanv pakbu! ngo achialvbv raaibv riyav, ngo patwk haka achialvgo doopvkunv, ngo svnyakpanam haka megojogo himpv kunv, okv ngo sise dvlvbv ridarirala ripv kunv. <sup>24</sup> Jius nyi vdwv nga dvngrap lvngu go dvngla dvngrap lo chaam gula kia go svchikla svnyak panamma ngo paanv. <sup>25</sup> Roman nyi vdwv nga lvom go svnyak patoku; okv lvko nga vlvng orki tvvto. Svpw v lvom go nga darmwk gvpv kunv, okv isi lo ngo alu gula ayu go doopvkunv. <sup>26</sup> Ngoogv mooying vngkulo ngo silwk ma-ngv doopv kunv svcharmoyar lokv okv dvchonv vdw gvlokv, ngo Atunyi vdw gvlokv okv Jentail vdw gvlokv; Pamtv vdwlo alvmatoku, mootum alvmakulo, svmasa lo, okv mvnvrnunv ajin vdwgvlo ka. <sup>27</sup> Ngo kudungkua rila okv hiru a hintoku; yupnam supnam goka paakumabv rito; ngo tvngnwng okv kano ngaaka himpv kunv; dv-

---

**11:23** Nyim 16:23    **11:24** Det 25:3    **11:25** Nyim 16:22; Nyim 14:19    **11:26** Nyim 9:23; Nyim 14:5

namtvngnam, vji vbee doosing dakpo nyumchi dubv rinam kaama bv ribwngto. <sup>28</sup> Okv kvvbi ha mingkwng kumabv, alu gv dwkia ngo gvrja mvnwng gv lvkwngbv mvngla mvnglv kumabv mvngdu kunv. <sup>29</sup> Vdwlo akonv anyuapa mabv ririnyi ngooka anyuapa mabv riming gvdu, vdwlo akonyi rimur rimududw ngo achialvbv mvngdwk riadukunv.

<sup>30</sup> Ngo kaibv goorung sego bolo, ngo ogunv lvkwnglo goola hv ngam vdwgo aronvgobv rimududw ho lvgabv goore. <sup>31</sup> Ngoogv mvvma rungma nvnga—Pwknvyarnv, Ahtu Jisu gv Abu chindu—ninyigv aminv dvbvsvngtambv doobwng laka! <sup>32</sup> Ngoogv Damaskas lo doorilo, ngam naatung dubv vla Dvbv Aretas gv arwnglo doonv gobunor angv pamtv aagialo sipai dakya motoku. <sup>33</sup> Vbvritola nga paapi gulo doomu gvrila chikchi a mvko tvla soolula ninyigv lokv kelin mopvkunv.

## 12

### *Paul gv Nyikrw okv nyikrwkaatamnam*

<sup>1</sup> Ngo kaibv goorungre, si alvngobv rima-jeka. Vbvritola vjak ngo Ahtu gv nyikrw okv kaatamnam vkvlvkwngbv minre. <sup>2</sup> Anying nyin-gring gola nyingpi gubv ripvku Kristan nyi ako nyido gv dootar tolo naachanam anga hum ngo chindu. (Sum jvjvbw ritobvdw vmalo hv nyikrw bv kaapv nvdw ngo chima, Pwknvyarnv mwng chindu). <sup>3</sup> Ngo mindvdu, so nyi anga Paradais tolo naacha toku ngo chindu (lvkodv, ngo chinchima

si jvjv bv ripv nvdw vmalo hv nyikrw gupvdw—Pwknvyarnv mwng chimwngdu), <sup>4</sup> okv tolo nw tanyi gv gaam bv mila manam vkv, nabor lokv japla manam vkv tvvpa toku. <sup>5</sup> Vkvlgabv so nyi gv lvkwngbv ngo goore—vbvritola ngo atubongv ogugo abittait nvgobv kaatam dudw hum miyam-abv, ngo atubogv lvkwngbv goomare. <sup>6</sup> Ngo goosu nvpv mvngdaka, ngo pvcha nvgobv rimare, ogulvgavbolo ngo jvjv nga mindu. Vbvritola ngo goosumare, ogulvgavbolo ngo nonu gvlokv akonyika ngo gvlokv tvvnam kaanam lo doomabv um minbin ribin yadubv rinam a ngo mvngma dunv.

<sup>7</sup> Vbvritola ngoogv kaasartabobv kaanam vd-wlokv nga kaibv goosu momanam lvkwngbv, ngam ayaklo achinam go jilwkpv, hv Uyu gv gindung jokria nvgobv jinam aingbv ngam dvngyadu okv ngam goomu madu. <sup>8</sup> Ahtunyi sum naala naa jilabv vla ngo lvom go kumtoku. <sup>9</sup> Vbvritola ninyigv mirwksinamv “Ngoogv aya ngv no gv lv-gabv awyaje dukunv, vdwlo no abittait rikudw ngoogv jwkrw v nam gwlvkyachok modunv.” Vb-vrikunamv ngo ngoogv abittait a googing nvvse nga ngo mvngpu yadunv, ogulvgavbolo Kristo gv ringyanv jwkrw ha ngoogvlo doolwk monam lvgabv. <sup>10</sup> Ngo Kristo gv lvkwngbv, abittait nama, nyarjikau ha, hirukaya nga, mvdwkmvku ha, okv adwkaku ha um ngo hangnyumchi yadunv. Ogulvgabv vbolo vdwlo ngo abittait ridw, ho ngo gwlvk yanvgobv riyadu.

*Korinthians vdwgv lvkwngbv Paul gv mvngrunam*

11 Ngo pvchanv jvbv ridu—vbvritola nonuno ngam vbv rimudu. Nonuno ngam tolwktoak dunv vla kaatam sego doodunv. Ogulvgavbolo ngo ogumanv gobv rijeka, nonugv alvyachoknv “apostol” vla minam vdwa ngo achuk guka miang yama dunv. 12 Ngoogv saktv sidula nyaknyibv kudungkua riku lokv, Pwknvyarnv nonua ngo gvlokv awgo lamrwpanam okv kaasartabo a riji toku. So gv rikunam vdwsu ngam Apostol hvkv vla kaatam dunv. 13 Ngoogv nonua ngam morkoain go ridur labvka vla minam ha mimabolo, ngoogv kvvbi gvrja vdwa lvyabv nonua alvmabv rinam minam go kaama. Ngoogv achialvbv dindapalamabv riku nama ayala ngam mvngnga jilabv!

14 Si lvom nvnvku ngoogv nonua kaalwk dubv vla mvkimvak pvkunamv—okv ngo nonua koonam go kooku mare. Ngoogv dinchi namv nonu, morko ngama. Anyung ngv vbvridu kuu vdww anvabu a jichasoocha madunv vbvritola anvabu yangv kuu vdwa jichasoocha yadunv. 15 Ngo nonua ridurnam lvgabv ngo ogugo doopvdw ho mvnwnngnga okv ngo atubongvka korcha svnga mvngpu dunv. Ngoogv nonua achialvbv aya kolokv nonuno ngam miang go aya mvngridw?

16 Ngoogv nonua ogugo risebuse go rilwk manama kvvbi gunv hum akonv vbv minre ngo nonua arwng runгла nonua gwngkup dubv mvvdunv vla minri nvpv. 17 Ogubv? Ngoogv nonu gvlo jokmunam nyi vdww gvlokv akin goloka ngo nonua dvbo yanam go doopvi? 18 Ngo Taitasnyi koola minla vngmuto, okv ninyia lvkobv mvngjwngnv vdwa vngmupvnnv. Nonuno Taitas nonua dvbo

yapv vdunvre? Ngo okv nw ngonyiv atuk lokv mvngnamsaknam mv ridungmindung ngv akin mapv nvgoi?

<sup>19</sup> Nonu vbvka mvngdunvpv ngonu atubongv nonugv kaagialo ringsunambv ridu nvgo vla. Ma! Pwknvyarnv gv tvgia kaagialo Kristo gv ngonua rimu mimu nama ngonu mindunv, okv ngonugv rinam mvnwngngv, nonua ridurnam lvkwngbv ripvvnv. <sup>20</sup> Ngo busudu vdwlo ngo nonugv ho aaridw ngoogv mvngku loka nonua aku sudubv kaaridw vla okv nonu ngamka nonugv mvngku loka aku sudubv kaala riri kudw vla. Ngoogv busu gonv nonua ngo yalung dumi sidubv okv tanyum gvmi sidubv, tuptup minsi dubv okv nabung minsi madubv, nyarjika minsi dubv okv rwsj japmi sidubv, goomi sidubv okv asarai madubv kaajila vla. <sup>21</sup> Vdwlo ngo nonua lvko-gunv tolo kaalwk rinyi Pwknvyarnv ngam hiny-ing go paamu ridw vla ngo kapnam gubv rire ogulvgabv vbolo nyi achialvgo vjaklodvbv kvvlo gv alvmabv ridung singdung rimur a topu mabv ribwng nyadu. Nyi vdwv vjaklodvbv tvvmabv rimur nama, kaabiutarila rimur minsu nama, okv nyimv nyilo bv rimur minsunam, so vdwa ribwng nyadu.

## 13

### *Minyabv gamrwnam okv kumrwknam*

<sup>1</sup> Ngoogv nonua kaalwk kunamv so si vjak lvom nvnvku. Darwknv kitaplo mindu—“Gungnying gubolo um tvvnvkaanv nyi lo anyi gumalo um

kaiyago doomu gvrila japjup jilaka.” <sup>2</sup> Ngoogv nonua lvnyi nvbv kaalwkri hoka ngo nonua gamrwto nonu okv yvvdw rimur ridung nga kayu maridw mvritre vla. Vjakka ngo nonua adudo, vbvritola ngo ho gamrw ha nonua minbwng dunv. <sup>3</sup> So si nonua kaabwk moreku ngo Kristo gv lvkwngbv mindu vla. Vdwlo nw nonua minbkw jiri kudw, nw abittait nvgobv rimare, nw nonu gvlo jwkrw kairungnv gubv rire! <sup>4</sup> Ninyia daapo lo takki namsi ninyigv rinyu manam gubvka ridu, so si Pwknvyarnv gv jwkrw lokv nw turrappvkunv. Ngonuka ninyigv lvkinbv anyu kumadu; vbvritola ngonu nonua lvkin minsu kunam lvkwngbv ngonuka ninyi turnam lokv Pwknvyarnv gv jwkrw a jimi sidunv. <sup>5</sup> Nonuno mvngjwnglo doodu nvdw dooma dunvdw, atuv rika darka sula jwngkadaka sitolaka. Jisu Kristo no gvlo doodu vla no jvjv bv chindure?—Vbv mabolo no arochoko ngvkula. <sup>6</sup> Ngo mvngjwngdo ngonu ajwk-alak manv gubv rima vla nonuno chinreku. <sup>7</sup> Ngonu kumdunv nonuno rimur go riku mare—ngonugv kumanammv atubongv alvbv kaakudubv vla, vbvritola nonua jvjvlo rimu dakmu dukubv, ngonu ajwk kuma nvgobv kaaku jeka. <sup>8</sup> Oguglvga ngonu jvjv nga haakla ria sibv rinyu ma, vbvritola ngonugv rinam mv jvjvgv lvkwngbv ridu kunv. <sup>9</sup> Ngonu abittait nvgobv ridaka, ngonu mvngpudu vbvritola nonuno gwlwk yadu. Okv vkvlgabv ngonu nonua humka alvyabv rilak vnglak yanv gubv ritokv vla kumdunv. <sup>10</sup> Vkvlgabv ngo adu lo doogvrila sum nonua lvkdunv; so si vbv vdwlw ngo vngchi rikudw ngo Ahtu gv jwkrw jinam lokv rinvnvla nonua mintapmirapla minamrinam go

kaama dubv—riyakrichak mabvya nonua turbudalvnnv jwkrw gubv riya dubv.

<sup>11</sup> Ngoogv ajin vdwa, alvbv doolaka! ngoogv minam ha alvbv tvvgap tvlaka; okv alvyabv rilv yalaka; Tvvmi kaami sula okv sarsopoyo bv doobamdakbam dubv rilaka. Vjak ngo kumdunv paknam ha sarsopoyo nga jinv Pwknvyarnv nonua lvkobv doolaka.

<sup>12</sup> Akin-akin a sarsopoyo gv mopup dvtakbv jimi sulaka.

Pwknvyarnv gv nyi mvnwnngv bunugv kumrwklytak a nonua jilwkdu.

<sup>13</sup> Ahtu Jisu Kristo gv aya ngv, Pwknvyarnv gv paknam v, okv Darwknv Dow gv remingdakming gvnam mv nonu mvnwnngnga lvkobv dooming gvlaka.

**ANWNV GAMLV**  
**Tagin first Bible translation based on TEV (Good News)**  
copyright © 2018 The Word for the World International

Language: (Tagin)

Contributor: The Word for the World International

The New Testament in Tagin  
Published as

**ANWNV GAMLV**

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

---

PDF generated using Haiola and XeLaTeX on 22 Feb 2024 from source files dated 15 Apr 2023

65e96bca-33d6-5dc6-a8ee-da485ecfb7ed